

• **Futbola**

Athletic: Europako postuei begira, oso puntu garrantzitsuak izango ditu gaur jokoan Montjuicen Espanyolen aurka → **27**

• **Eskubaloia**

Bidasoa: Irungo taldeak gaur dauka, Valladoliden, Asobal Ligako jaitsiera fasetik libratzeko azkeneko posibilitatea → **31**

Athletic ♦ Taldea 2000. urteko ekainean utziko duela aurreratu du entrenatzaileak

Fernandezek ez du jarraituko


«Lau urtekoa ziklo ona da entrenatzaile batentzat», esan du

Asier Iturriagaetxebarria / Bilbo

LUIS FERNANDEZ-EK kontratua bukatzen zaionean utziko du Athletic; hau da, 2000. urteko ekainaren 30ean. «Lau urtekoa ziklo ona da entrenatzaile batentzat. Bost urte egitea zailagoa da», esan zuen atzo Espanyolen aurkako partiduen bezperan. Modu horretan, baieztatu egin zuen atzo kirol egunkari baten azaldutakoa.

Behin baino gehiagotan hitz egin da ea Luis Fernandezek bost urte egingo ote zituen Athleticen. Jose Mari Arrate presidenteak ere argi utzi du bere aldetik ez dela arazorik izango. Bestalde, entrenatzaileak bi aldiz luzatu du kontratua zuri-gorriekin, eta bietan bukatu baino hil batzuk lehenago jakinarazi du bere erabakia. Orain ez da horrela izan. Zaleen eta zuzendaritza taldearen presioa saihesteko-edo, argi utzi nahi izan du ez duela jarraituko.

Luis Fernandezek behin baino gehiagotan esana zuen egunen batean utzi egin beharko zuela Athletic. Izan ere, bere semeetako batek ez du aukerarik Bilbon bere



JOSU ETXEBERRIOSTE

Luis Fernandez, 1996ko ekainaren 19an San Mamesen, Arrate aurrean duela, Athleticekin fitxatzera etorri zenean.

ikasketekin jarraitzeko. «Bakarrik banengo, hamar edo hamabost urte egongo nintzateke, edo hemen bukatuko nuke nire karrera. Baina kontuan izan behar da emaztea eta semeak ditudala», azpimarratu zuen.

Joateko asmoa adierazi bazuen ere, Euskal Herrian oso gustura dagoela azaldu zuen Fernandezek. «Hemen baino hobeto ez naiz beste inon egongo, eta, horregatik, badakit joateko unea oso gogorra izango dela».

Entrenatzaile bakoitzak bere zikloa duela esan zuen, eta hortik aurrera egoerak okerrera egiten duela. Hori gertatzerik ez du nahi Fernandezek. «Jendea nitaz oroitzen denean, profesional on bat izan nintzela esatea nahi

LUIS FERNANDEZ

■ ■ ■ «Bakarrik banengo, 10 edo 15 urte egongo nintzateke hemen, baina emaztea eta semeak dauzkat»

dut, eta joaten naizenean egoera onean utzi nahi dut Athletic».

Ildo horretan, Ligan talde bera lau urte entrenatzen aritu den entrenatzaileak ez dagoela gogoratu zuen Luis Fernandezek. Izan ere, momentu honetan Ligan ez dago inor bera baino denborra gehiago eman duenik talde bera entrenatzen. Eta

Fernandezek hirugarren denboraldia bete du aurtan Athleticen. Tarte honetan, 106 aldiz zuzendu du talde zuri-gorria.

Nora joango den erabaki gabe du

Erabaki gabe du nora joango den Bilbotik alde egiten duenean. «Hemen lan egin dezaket, Frantzia, Ingalaterra, Japonia... Kirol arloan ez dut ezer programatua. Oporrik gabe hogeitaz urte ere badaramatzat, baina ez naiz kekatzen, egiten dudana pribilegio bat baita».

Ligako beste talderen batean joateko aukerarik badagoan galdetutakoan, Fernandezek adierazi zuen ez duela baztertzeko aukera hori.

Arratek ez du baztertzeko hirugarren agintaldirako aurkeztea

Erredakzioa / Bilbo

LUIS FERNANDEZ-EK Athleticen ez duela jarraituko aurreratu zuen, eta Jose Mari Arrate presidentek, aldiz, Efe-Irratiari egindako adierazpenetan, esan zuen ez duela baztertzeko hirugarren agintaldirako hauteskundeetara aurkeztea. Arrateren bigarren agintaldia 2001. urteko ekainean bukatuko da, eta, dirudienez, hurrengo hauteskundeetara aurkezteko asmoa du.

«Bi urte barru erabakiko dut berriro aurkeztuko naizen hauteskundeetara edo ez», esan zuen Arrate presidentek. Halaber, bera presidente gisa egon den urteetan Athleticen izandako emaitzekin «gustura eta poz-pozik» dagoela azpimarratu zuen. «Gauzak ondo joan dira, baina badakigu gaizki ere joan zitezkeela».

Hauteskundeetara aurkeztuko den erabakitze orduan hainbat gauza izango ditu kontuan: «Ni nola nagoen, bazkidea nola dagoen, ditudan laguntzak eta beste zirkunstantzia batzuk».

Athleticeko presidente gisa egindako lanarekin gustura dagoela adierazi bazuen ere, «postu estresagarria, nekagarria eta erantzukizun handikoa» dela onartu zuen Jose Mari Arratek Efe-Irratiari eskainitako elkarrizketan.